



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎ

Ո Ր Ո Շ ՈՒ Մ

28 սեպտեմբերի 2021 թվականի թիվ 260-Ա

**«ԱՐՄԵՆԻԱՆ ՏՈՐԱԿՈ ՔՈՄՓԱՆԻ» ՍԱՀՄԱՆԱՓԱԿ ՊԱՏԱՍԽԱՆԱՏՎՈՒԹՅԱՄԲ
ԸՆԿԵՐՈՒԹՅԱՆ ԵՎ ՖԻԶԻԿԱԿԱՆ ԱՆՁ ՎԱՐՂԱՆ ՌՈՒՔԻԿԻ ՀԱՐՈՒԹՅՈՒՆՅԱՆԻ
ՆԿԱՏՄԱՄԲ ՊԱՏԱՍԽԱՆԱՏՎՈՒԹՅԱՆ ՄԻՋՈՑ ԿԻՐԱՌԵԼՈՒ ՄԱՍԻՆ**

Մրցակցության պաշտպանության հանձնաժողովը (այսուհետ նաև՝ **Հանձնաժողով**) 2021 թվականի սեպտեմբերի 28-ի նիստում, քննարկելով «Արմենիան Տորակո Քոմփանի» սահմանափակ պատասխանատվությամբ ընկերության (այսուհետ նաև՝ **Ընկերություն**) և ֆիզիկական անձ Վարդան Ռուբիկի Հարությունյանի նկատմամբ պատասխանատվության միջոց կիրառելու մասին հարցը,

Պ Ա Ր Զ Ե Ց

1. Վարչական վարույթի ընթացքի հակիրճ նկարագրությունը.

Հանձնաժողովը 2021 թվականի հուլիսի 6-ին ««Արմենիան Տորակո Քոմփանի» սահմանափակ պատասխանատվությամբ ընկերության և ֆիզիկական անձ Վարդան Ռուբիկի Հարությունյանի կողմից տնտեսական մրցակցության բնագավառում իրավախախտման վերաբերյալ վարույթ հարուցելու մասին» թիվ 151-Ա որոշմամբ (այսուհետ նաև՝ **Թիվ 151-Ա որոշում**) հարուցել է վարույթ (այսուհետ նաև՝ **Վարույթ**):

2. Վարույթով մասնակիցների դիրքորոշումները.

Ֆիզիկական անձ Վարդան Ռուբիկի Հարությունյանի դիրքորոշումը.

Ֆիզիկական անձ Վարդան Ռուբիկի Հարությունյանը 2021 թվականի օգոստոսի 17-ին Հանձնաժողով ներկայացված գրությամբ հայտնել է, որ ֆիզիկական անձ Վարդան Ռուբիկի Հարությունյանի և Սուսաննա Զաքարի Զաքարյանի միջև առկա է փոխկապակցվածություն և Օրենքի իմաստով վերջիններս դիտարկվում են անձանց խումբ, ինչը հիմնավորվում է նրանով, որ Սուսաննա Զաքարի Զաքարյանը հանդիսանում է Վարդան Ռուբիկի Հարությունյանի մայրը (ծնողը), ուստի և Սուսաննա Զաքարի Զաքարյանին պատկանող

33,34 տոկոս բաժնեմասի ձեռքբերումը իրենից ենթադրում է գործարք, որը տեղի է ունեցել անձանց խումբ հանդիսացող տնտեսավարող սուբյեկտների միջև, հետևաբար չէր կարող համարվել համակենտրոնացում:

Վարդան Ռուբիկի Հարությունյանը հայտնել է, որ այն դեպքում, երբ բաժնեմասնակցության օտարումը (առավել ևս նվիրատվության տեսքով) տեղի է ունեցել ֆիզիկական անձի ընտանիքի անդամների միջև, ապա այդպիսի հանգամանքը տնտեսական մրցակցության տեսանկյունից չպետք է առաջացնի խնդիրներ և միաժամանակ ենթադրի, որ գործարքի մասնակիցները պետք է անպայման որոշակի փոխկապակցվածություն ունենան այն ընկերության հետ, որի կանոնադրական կապիտալում առկա բաժնեմասնակցությունը օտարվում է:

Ամփոփելով, Վարդան Ռուբիկի Հարությունյանը նշել է, որ գտնում է, որ Վարդան Ռուբիկի Հարությունյանի և Սուսաննա Զաքարի Զաքարյանի միջև բաժնեմասերի օտարումը (ֆիզիկական անձ Վարդան Ռուբիկի Հարությունյանի կողմից «Արմենիան Տոբակո Քոմփանի» սահմանափակ պատասխանատվությամբ ընկերության կանոնադրական կապիտալում Սուսաննա Զաքարի Զաքարյանին պատկանող 33,34 տոկոս բաժնեմասի ձեռք բերելը) տեղի է ունեցել անձանց խումբ հանդիսացող տնտեսավարող սուբյեկտների միջև, ուստի և Հանձնաժողովում այդպիսի համակենտրոնացումը ենթակա չի եղել հայտարարագրման:

«Արմենիան Տոբակո Քոմփանի» սահմանափակ պատասխանատվությամբ ընկերության դիրքորոշումը.

Ընկերությունը 2021 թվականի օգոստոսի 12-ին Հանձնաժողով ներկայացված գրությամբ հայտնել է, որ Օրենքով ֆիզիկական անձի, նրա ամուսնու, ծնողի, զավակի, եղբոր և քրոջ միջև գործարքի կնքումը և իրականացումը ինքնին բավարար է, որպեսզի այն դիտարկվի որպես անձանց խումբ հանդիսացող տնտեսավարող սուբյեկտների միջև գործարքի իրականացում, հետևաբար այդ տեսանկյունից Օրենքի 4.1-ին հոդվածի 1-ին մասի 11-րդ կետով նախատեսված անձանց խմբի առկայության պայմաններում գործարքի մասնակից ֆիզիկական անձի և Ընկերության միջև առկա փոխկապակցվածության վերաբերյալ տեղեկատվություն կամ փաստաթուղթ ներկայացնելու պահանջ Օրենքով նախատեսված չէ: Բացի այդ տրամաբանական է, որ այն դեպքում, եթե բաժնեմասնակցության օտարումը (առավել ևս նվիրատվության տեսքով) տեղի է ունեցել ֆիզիկական անձի ընտանիքի անդամների միջև, ապա այդպիսի հանգամանքը տնտեսական մրցակցության տեսանկյունից չպետք է առաջացնի խնդիրներ և միաժամանակ ենթադրի, որ գործարքի մասնակիցները պետք է անպայման որոշակի փոխկապակցվածություն ունենան այն ընկերության հետ, որի կանոնադրական կապիտալում առկա բաժնեմասնակցությունը օտարվում է:

Ամփոփելով, Ընկերությունը նշել է, որ գտնում է, որ.

1) Վարդան Ռուբիկի Հարությունյանի և Սուսաննա Զաքարի Զաքարյանի միջև բաժնեմասերի օտարումը (ֆիզիկական անձ Վարդան Ռուբիկի Հարությունյանի կողմից «Արմենիան Տոբակո Քոմփանի» սահմանափակ պատասխանատվությամբ ընկերության կանոնադրական կապիտալում Սուսաննա Զաքարի Զաքարյանին պատկանող 33,34 տոկոս

բաժնեմասը ձեռք բերելը) տեղի է ունեցել անձանց խումբ հանդիսացող տնտեսավարող սուբյեկտների միջև, ուստի և Հանձնաժողովում այդպիսի համակենտրոնացումը ենթակա չի եղել հայտարարագրման,

2) Ընկերությունը գործող օրենսդրության տեսանկյունից չի կրում որևէ պարտավորություն Հանձնաժողովին ներկայացնելու Ընկերության և Վարդան Ռուբիկի Հարությունյանի միջև անձանց խմբի հատկանիշները հավաստող ապացույցներ՝ 1-ին կետում նշված պատճառաբանությամբ:

3. Հանձնաժողովի կողմից պահանջված և ստացված փաստաթղթերը և այլ տեղեկատվությունը.

1. Հանձնաժողովի կողմից իրականացվել է ուսումնասիրություն՝ չհայտարարագրված համակենտրոնացումների հնարավոր դեպքերի հայտնաբերման նպատակով, որի շրջանակներում դիտարկվել են 2019 թվականի ընթացքում տեղի ունեցած տնտեսավարող սուբյեկտների միացման, միաձուլման, փայաբաժնի ձեռքբերման գործարքները: Ուսումնասիրության ընթացքում հիմք է ընդունվել Արդարադատության նախարարության իրավաբանական անձանց պետական ռեգիստրի գործակալության <https://www.e-register.am/> պաշտոնական էլեկտրոնային համակարգում առկա տեղեկատվությունը:

Մասնավորապես, համաձայն վերը նշված տեղեկատվության 2019 թվականի դեկտեմբերի 6-ին ֆիզիկական անձ Վարդան Ռուբիկի Հարությունյանը ձեռք է բերել Ընկերության կանոնադրական կապիտալում Սուսաննա Զաքարի Զաքարյանին պատկանող 33,34 տոկոս բաժնեմասը:

Ուսումնասիրության շրջանակներում Հանձնաժողովի նախագահի 2021 թվականի ապրիլի 16-ի N ԳԳ-949 գրությամբ Ընկերությունից պահանջվել է հետևյալ տեղեկատվությունը.

- Ընկերության գործունեության ոլորտը, կոնտակտային տվյալները (հեռախոսահամար, էլեկտրոնային փոստի հասցե, ծանուցման հասցե և այլն),

- գործարքին նախորդող ֆինանսական տարվա՝ 2018 թվականի Ընկերության ակտիվների հաշվեկշռային արժեքը և հասույթի չափը՝ կցելով շահութահարկի հաշվարկը,

- փայաբաժինը ձեռքբերող ֆիզիկական անձի կոնտակտային տվյալները (հեռախոսահամար, էլեկտրոնային փոստի հասցե և այլն), ծանուցման հասցե, անձնագրի պատճենը,

- մինչև գործարքը Ընկերության և փայաբաժին ձեռքբերող ֆիզիկական անձի միջև Օրենքի իմաստով անձանց խմբի հատկանիշների առկայության դեպքում՝ անձանց խմբի հատկանիշները հավաստող փաստաթղթերը:

Ընկերության կողմից 2021 թվականի մայիսի 04-ին և մայիսի 17-ին Հանձնաժողով ներկայացված տեղեկատվության համաձայն Ընկերությունը զբաղվում է ծխախոտային արտադրատեսակների արտադրությամբ:

Ընկերության 2018 թվականի ֆինանսական տարվա ակտիվների արժեքը կազմել է
դրամ, իսկ հասույթի չափը՝ դրամ:

Ընկերության կողմից նշվել է նաև, որ Սուսաննա Զաքարի Զաքարյանը հանդիսանում է Վարդան Ռուբիկի Հարությունյանի մայրը:

Հարկ է նշել, որ Ընկերությունը Հանձնաժողով չի ներկայացրել գործարքի մասնակիցների՝ Ընկերության և Վարդան Ռուբիկի Հարությունյանի միջև անձանց խմբի հատկանիշները հավաստող ապացույցներ:

2. Հանձնաժողովը 2021 թվականի հուլիսի 6-ին ««Արմենիան Տոբակո Քոմփանի» սահմանափակ պատասխանատվությամբ ընկերության և ֆիզիկական անձ Վարդան Ռուբիկի Հարությունյանի կողմից տնտեսական մրցակցության բնագավառում իրավախախտման վերաբերյալ վարույթ հարուցելու մասին» թիվ 151-Ա որոշմամբ հարուցել է Վարույթ: Վարույթի շրջանակներում Հանձնաժողովի նախագահի 2021 թվականի հուլիսի 9-ի N ՀԿ-1694 գրությամբ ֆիզիկական անձ Վարդան Ռուբիկի Հարությունյանից պահանջվել է Հանձնաժողով ներկայացնել հետևյալ տեղեկատվությունը.

- այն տնտեսավարող սուբյեկտների ցանկը, որտեղ փայաբաժին ձեռքբերող անձը և իրավահարաբերության ծագման պահին գործող խմբագրությամբ Օրենքի 4.1 հոդվածի իմաստով նրա հետ անձանց խումբ հանդիսացող ֆիզիկական և իրավաբանական անձինք ունեն մասնակցություն, այդ տնտեսավարող սուբյեկտներում ունեցած փայաբաժնի չափը՝ տոկոսով, այդ տնտեսավարող սուբյեկտների գործունեության ոլորտները:

Ֆիզիկական անձ Վարդան Ռուբիկի Հարությունյանի կողմից Հանձնաժողով ներկայացված 2021 թվականի օգոստոսի 17-ի գրության համաձայն, ֆիզիկական անձ Վարդան Ռուբիկի Հարությունյանը փայաբաժնի ձեռք բերման պահին որևէ տնտեսավարող սուբյեկտի կապիտալում մասնակցություն չի ունեցել, իսկ Վարդան Ռուբիկի Հարությունյանի հետ Օրենքի 4-րդ հոդվածի 12-րդ մասի համաձայն անձանց խումբ կազմող Սուսաննա Զաքարի Զաքարյանը մասնակցություն ունի «Գազոյլ» սահմանափակ պատասխանատվությամբ ընկերության կանոնադրական կապիտալում՝ 50 տոկոս և «Ֆրիզե» սահմանափակ պատասխանատվությամբ ընկերության կանոնադրական կապիտալում՝ 100 տոկոս բաժնեմասերով:

3. Վարույթի շրջանակներում Հանձնաժողովի նախագահի 2021 թվականի հուլիսի 9-ի N ՀԿ-1693 գրությամբ Ընկերությունից պահանջվել է Հանձնաժողով ներկայացնել հետևյալ տեղեկատվությունը.

- մինչև գործարքը և գործարքից հետո Ընկերության կանոնադրության, կանոնադրության փոփոխությունների պատճենները, քաղվածքը,

- այն տնտեսավարող սուբյեկտների ցանկը, որտեղ Ընկերությունը և իրավահարաբերության ծագման պահին գործող խմբագրությամբ Օրենքի 4.1 հոդվածով Ընկերության հետ անձանց խումբ հանդիսացող ֆիզիկական և իրավաբանական անձինք ունեն մասնակցություն, փայաբաժնի չափը՝ տոկոսով, այդ ընկերությունների գործունեության ոլորտները,

- այն տնտեսավարող սուբյեկտների ցանկը, որտեղ փայաբաժին ձեռքբերող անձը և իրավահարաբերության ծագման պահին գործող խմբագրությամբ Օրենքի 4.1 հոդվածի իմաստով նրա հետ անձանց խումբ հանդիսացող ֆիզիկական և իրավաբանական անձինք

ունեն մասնակցություն, այդ տնտեսավարող սուբյեկտներում ունեցած փայաբաժնի չափը՝ տոկոսով, այդ տնտեսավարող սուբյեկտների գործունեության ոլորտները,

- փայաբաժին ձեռքբերող ֆիզիկական անձի կողմից Ընկերության բաժնեմասի ձեռքբերման պայմանագրի պատճենը:

Ընկերության կողմից Հանձնաժողով ներկայացված 2021 թվականի օգոստոսի 12-ի գրության համաձայն.

1) Ընկերությունն ունի մասնակցություն «Էյչ Զի Քեյ Դիսթրիբյուշն» և «Տոբակո Քոմփանի» (Ռուսաստանի Դաշնությունում գրանցված) սահմանափակ պատասխանատվությամբ ընկերությունների կանոնադրական կապիտալում՝ 100 տոկոս բաժնեմասով: «Էյչ Զի Քեյ Դիսթրիբյուշն» և «Տոբակո Քոմփանի» սահմանափակ պատասխանատվությամբ ընկերությունների գործունեության ոլորտը ծխախոտի առուվաճառքն է:

2) Ֆիզիկական անձ Վարդան Ռուբիկի Հարությունյանը փայաբաժնի ձեռք բերման պահին որևէ տնտեսավարող սուբյեկտի կապիտալում մասնակցություն չի ունեցել, իսկ Վարդան Ռուբիկի Հարությունյանի հետ Օրենքի 4-րդ հոդվածի 12-րդ մասի համաձայն անձանց խումբ կազմող Սուսաննա Զաքարի Զաքարյանը մասնակցություն ունի «Գազոյլ» սահմանափակ պատասխանատվությամբ ընկերության կանոնադրական կապիտալում՝ 50 տոկոս և «Ֆրիգե» սահմանափակ պատասխանատվությամբ ընկերության կանոնադրական կապիտալում՝ 100 տոկոս բաժնեմասերով:

4. Գործի բազմակողմանի, լրիվ և օբյեկտիվ քննարկման արդյունքում Հանձնաժողովը հաստատված է համարում հետևյալ փաստական հանգամանքները.

1. 2019 թվականի դեկտեմբերի 6-ին ֆիզիկական անձ Վարդան Ռուբիկի Հարությունյանը ձեռք է բերել Ընկերության կանոնադրական կապիտալում Սուսաննա Զաքարի Զաքարյանին պատկանող 33,34 տոկոս բաժնեմասը:

2. Ընկերությունը զբաղվում է ծխախոտային արտադրատեսակների արտադրությամբ:

3. Ընկերության 2018 թվականի ֆինանսական տարվա ակտիվների արժեքը կազմել է դրամ, իսկ հասույթի չափը՝ դրամ:

4. Ընկերությունն ունի 100 տոկոս մասնակցություն «Էյչ Զի Քեյ Դիսթրիբյուշն» և «Տոբակո Քոմփանի» (Ռուսաստանի Դաշնությունում գրանցված) սահմանափակ պատասխանատվությամբ ընկերությունների կանոնադրական կապիտալում:

5. «Էյչ Զի Քեյ Դիսթրիբյուշն» և «Տոբակո Քոմփանի» սահմանափակ պատասխանատվությամբ ընկերությունների գործունեության ոլորտը ծխախոտի առուվաճառքն է:

6. Ֆիզիկական անձ Վարդան Ռուբիկի Հարությունյանը գործարքի կատարման պահին չի ունեցել մասնակցություն այլ ընկերություններում:

7. Ֆիզիկական անձ Վարդան Ռուբիկի Հարությունյանի հետ մինչև 2021 թվականի մայիսի 31-ը գործող խմբագրությամբ Օրենքի 4.1-ին հոդվածի 1-ին մասի 11-րդ կետի համաձայն անձանց խումբ հանդիսացող Սուսաննա Զաքարի Զաքարյանը մասնակցություն ունի «Գազոյլ» սահմանափակ պատասխանատվությամբ ընկերության կապիտալում՝ 50

տոկոս և «Ֆրիգե» սահմանափակ պատասխանատվությամբ ընկերության կապիտալում՝ 100 տոկոս բաժնեմասերով:

8. «Գազոյլ» սահմանափակ պատասխանատվությամբ ընկերությունը իրականացնում է ավտոմեքենաների համար հեղուկ գազի, սեղմված բնական գազի և գազոլիների մանրածախ առևտուր գազալցման կայաններում:

9. «Ֆրիգե» սահմանափակ պատասխանատվությամբ ընկերությունը իրականացնում է ռեստորանային ծառայությունների մատուցում:

10. Մինչև գործարքը և գործարքի իրականացման պահին Ընկերության և Վարդան Ռուբիկի Հարությունյանի միջև Օրենքի իմաստով առկա չեն եղել անձանց խմբի հատկանիշներ:

5. Վարչական վարույթի փաստական հանգամանքների և վերաբերելի իրավական նորմերի ուսումնասիրության և վերլուծության արդյունքում Հանձնաժողովը եզրահանգում է հետևյալին.

5.1) Ֆիզիկական անձ Վարդան Ռուբիկի Հարությունյանի կողմից իրավախախտում կատարված լինելու հարցի կապակցությամբ.

««Տնտեսական մրցակցության պաշտպանության մասին» օրենքում փոփոխություն կատարելու մասին» 2021 թվականի մարտի 3-ի ՀՕ-92-Ն օրենքի (ուժի մեջ է մտել 2021 թվականի մայիսի 31-ին) 1-ին հոդվածով «Տնտեսական մրցակցության պաշտպանության մասին» օրենքը շարադրվել է նոր խմբագրությամբ:

Մինչև 2021 թվականի մայիսի 31-ը գործող խմբագրությամբ Օրենքի 8-րդ հոդվածի 1-ին մասի 4-րդ կետի համաձայն՝ տնտեսվարող սուբյեկտների համակենտրոնացում է համարվում տնտեսվարող սուբյեկտի կողմից Հայաստանի Հանրապետությունում գրանցված այլ տնտեսվարող սուբյեկտի փայաբաժնի ձեռքբերումը, եթե դա ինքնին կամ ձեռք բերողին արդեն պատկանող փայաբաժնի հետ միասին կազմում է այդ տնտեսվարող սուբյեկտի կանոնադրական (բաժնեհավաք) կապիտալի 20 տոկոսը կամ ավելին:

Մինչև 2021 թվականի մայիսի 31-ը գործող խմբագրությամբ Օրենքի 8-րդ հոդվածի 5-րդ մասի համաձայն՝ փայաբաժնի ձեռքբերման դեպքում համակենտրոնացման մասնակիցներ են փայաբաժին ձեռք բերող տնտեսվարող սուբյեկտը և այն տնտեսվարող սուբյեկտը, որի կանոնադրական (բաժնեհավաք) կապիտալում փայաբաժին է ձեռք բերվում:

Մինչև 2021 թվականի մայիսի 31-ը գործող խմբագրությամբ Օրենքի 8-րդ հոդվածի 7-րդ մասի համաձայն՝ համակենտրոնացումը կայացվում է՝

1) միևնույն ապրանքային շուկայում (հորիզոնական համակենտրոնացում).

2) որոշակի փոխկապակցվածություն ունեցող տարբեր ապրանքային շուկաներում (ուղղահայաց համակենտրոնացում).

3) տարբեր ապրանքային շուկաներում (խառը համակենտրոնացում):

Մինչև 2021 թվականի մայիսի 31-ը գործող խմբագրությամբ Օրենքի 9-րդ հոդվածից բխում է, որ համաձայն՝ տնտեսվարող սուբյեկտների համակենտրոնացումը, մինչև գործողության մեջ դնելը, ենթակա է հայտարարագրման, եթե՝ համակենտրոնացման մասնակիցների ակտիվների կամ հասույթի ընդհանուր արժեքը (չափը) կամ

մասնակիցներից առնվազն մեկի ակտիվների կամ հասույթի արժեքը (չափը) դրա ստեղծմանը նախորդող վերջին ֆինանսական տարում գերազանցել է Հանձնաժողովի 2016 թվականի դեկտեմբերի 16-ի «Հայտարարագրման ենթակա համակենտրոնացումների մասնակցի (մասնակիցների) ակտիվների և հասույթ(ներ)ի արժեքը (չափը) սահմանելու, տնտեսվարող սուբյեկտների համակենտրոնացման հայտարարագրման կարգի հայտարարագրի ձևի մասին» թիվ 478-Ն որոշմամբ սահմանված ակտիվների կամ հասույթ(ներ)ի արժեքը (չափը):

Մինչև 2021 թվականի մայիսի 31-ը գործող խմբագրությամբ Օրենքի 10-րդ հոդվածի 4-րդ մասի 1-ին ենթակետի համաձայն՝ արգելվում է հայտարարագրման ենթակա համակենտրոնացումը գործողության մեջ դնելը՝ մինչև Հանձնաժողովի կողմից որոշում կայացնելը (չհայտարարագրված համակենտրոնացում):

Մինչև 2021 թվականի մայիսի 31-ը գործող խմբագրությամբ Օրենքի 8-րդ հոդվածի 8-րդ մասի համաձայն՝ համակենտրոնացում չեն համարվում տնտեսվարող սուբյեկտների սույն հոդվածի 1-ին մասում նշված վերակազմակերպումները, գործողությունները կամ գործարքները, որոնք տեղի են ունենում սույն օրենքի 4.1-ին հոդվածի համաձայն անձանց խումբ հանդիսացող տնտեսվարող սուբյեկտների միջև:

Մինչև 2021 թվականի մայիսի 31-ը գործող խմբագրությամբ Օրենքի 4.1-ին հոդվածի 1-ին մասին 12-րդ կետի համաձայն՝ անձանց խումբն իրավաբանական և (կամ) ֆիզիկական այնպիսի անձանց խումբ է, որոնց միջև փաստացի առկա է փոխկապվածություն կամ վերահսկողություն, և որոնց նկատմամբ բավարարվում է հետևյալ պայմանը.

12) ֆիզիկական և (կամ) իրավաբանական անձինք, որոնցից յուրաքանչյուրը սույն մասում նշված հիմքերից որևէ մեկով անձանց խումբ է կազմում միևնույն անձի հետ, ինչպես նաև այլ անձինք, որոնք սույն մասում նշված հիմքերից որևէ մեկով տվյալ անձանցից որևէ մեկի հետ անձանց խումբ են կազմում:

Վերոգրյալ իրավակարգավորումներին նույնաբովանդակ դրույթներ նախատեսված են նաև գործող խմբագրությամբ Օրենքի 4-րդ, 13-րդ, 15-րդ և 73-րդ հոդվածներով:

Վերը նշված նորմերի վերլուծությունից հետևում է, որ տնտեսվարող սուբյեկտի կողմից Հայաստանի Հանրապետությունում գրանցված այլ տնտեսվարող սուբյեկտի փայաբաժնի ձեռքբերումը ենթակա է հայտարարագրման հետևյալ պայմանների միաժամանակյա առկայության դեպքում.

1) եթե դա ինքնին կամ ձեռք բերողին արդեն պատկանող փայաբաժնի հետ միասին կազմում է այդ տնտեսվարող սուբյեկտի կանոնադրական (բաժնեհավաք) կապիտալի 20 տոկոսը կամ ավելին

2) համակենտրոնացման մասնակիցների ակտիվների կամ հասույթի ընդհանուր արժեքը (չափը) կամ մասնակիցներից առնվազն մեկի ակտիվների կամ հասույթի արժեքը (չափը) դրա ստեղծմանը նախորդող վերջին ֆինանսական տարում գերազանցել է Հանձնաժողովի 2016 թվականի դեկտեմբերի 16-ի թիվ 478-Ն որոշմամբ սահմանված ակտիվների կամ հասույթ(ներ)ի արժեքը (չափը):

2019 թվականի դեկտեմբերի 6-ին ֆիզիկական անձ Վարդան Ռուբիկի Հարությունյանը ձեռք է բերել Ընկերության կանոնադրական կապիտալում Սուսաննա Զաքարի Զաքարյանին

պատկանող 33,34 տոկոս բաժնեմասը: Ընդ որում, Ընկերության 2018 թվականի ֆինանսական տարվա ակտիվների արժեքը կազմել է դրամ, իսկ հասույթի չափը՝ դրամ: Ընկերությունը իրականացնում է ծխախոտային արտադրատեսակների արտադրություն:

2019 թվականի դեկտեմբերի 6-ին ֆիզիկական անձ Վարդան Ռուբիկի Հարությունյանի կողմից Ընկերության կանոնադրական կապիտալում Սուսաննա Զաքարի Զաքարյանին պատկանող 33,34 տոկոս բաժնեմասի ձեռքբերման գործարքը ենթակա է եղել հայտարարագրման, քանի որ «Արմենիան Տոբակո Քոմփանի» ընկերության 2018 թվականի ակտիվների արժեքը գերազանցել է Հանձնաժողովի 2016 թվականի դեկտեմբերի 16-ի թիվ 478-Ն որոշմամբ սահմանված ակտիվների արժեքը:

Սույն գործի նյութերից հետևում է, որ Ընկերությունը իրականացնում է ծխախոտային արտադրատեսակների արտադրություն: Ֆիզիկական անձ Վարդան Ռուբիկի Հարությունյանը գործարքի կատարման պահին չի ունեցել մասնակցություն այլ ընկերություններում, սակայն ֆիզիկական անձ Վարդան Ռուբիկի Հարությունյանի հետ մինչև 2021 թվականի մայիսի 31-ը գործող խմբագրությամբ Օրենքի 4.1-ին հոդվածի 1-ին մասի 11-րդ կետի համաձայն անձանց խումբ հանդիսացող Սուսաննա Զաքարի Զաքարյանը հանդիսանում է «Գազոյլ» սահմանափակ պատասխանատվությամբ ընկերության մասնակից՝ 50 տոկոս բաժնեմասով և «Ֆրիզե» սահմանափակ պատասխանատվությամբ ընկերության մասնակից՝ 100 տոկոս բաժնեմասով:

Հանձնաժողովն արձանագրում է, որ մինչև 2021 թվականի մայիսի 31-ը գործող խմբագրությամբ Օրենքի 4.1-ին հոդվածի 1-ին մասի 1-ին կետի իմաստով Սուսաննա Զաքարի Զաքարյանի հետ անձանց խումբ հանդիսացող «Ֆրիզե» (իրականացնում է ռեստորանային ծառայությունների մատուցում) սահմանափակ պատասխանատվությամբ ընկերությունը «Արմենիան Տոբակո Քոմփանի» սահմանափակ պատասխանատվությամբ ընկերության հետ գործունեություն են իրականացնում տարբեր ոլորտներում: Հետևաբար, 2019 թվականին ֆիզիկական անձ Վարդան Ռուբիկի Հարությունյանի կողմից «Արմենիան Տոբակո Քոմփանի» սահմանափակ պատասխանատվությամբ ընկերության կանոնադրական կապիտալում 33,34 տոկոս բաժնեմասի ձեռքբերման գործարքը հայտարարագրվելու դեպքում ենթակա կլիներ գնահատման որպես խառը համակենտրոնացում, որը մրցակցության վրա չէր կարող ունենալ բացասական հետևանք:

Ինչ վերաբերում է Ընկերության և ֆիզիկական անձ Վարդան Ռուբիկի Հարությունյանի ներկայացրած դիրքորոշմանը այն մասով, որ համակենտրոնացումը ենթակա չի եղել հայտարարագրման, քանի որ տեղի է ունեցել անձանց խումբ կազմող տնտեսավարող սուբյեկտների միջև, հարկ է արձանագրել հետևյալը.

Մինչև 2021 թվականի մայիսի 31-ը գործող խմբագրությամբ Օրենքի 8-րդ հոդվածի 5-րդ մասի համաձայն՝ փայաբաժինի ձեռքբերման դեպքում համակենտրոնացման մասնակիցներ են փայաբաժին ձեռք բերող տնտեսավարող սուբյեկտը և այն տնտեսավարող սուբյեկտը, որի կանոնադրական (բաժնեհավաք) կապիտալում փայաբաժին է ձեռք բերվում: Տվյալ դեպքում համակենտրոնացման մասնակիցներ են փայաբաժին ձեռք բերող ֆիզիկական անձ Վարդան Ռուբիկի Հարությունյանը և Ընկերությունը:

Հանձնաժողովն արձանագրում է, որ ֆիզիկական անձ Վարդան Ռուբիկի Հարությունյանը և Սուսաննա Զաքարի Զաքարյանը մինչև 2021 թվականի մայիսի 31-ը գործող խմբագրությամբ Օրենքի 4.1-ին հոդվածի 1-ին մասի 12-րդ կետի համաձայն հանդիսանում են անձանց խումբ: Միաժամանակ Հանձնաժողովն արձանագրում է նաև, որ մինչև 2021 թվականի մայիսի 31-ը գործող խմբագրությամբ Օրենքի 4.1-ին հոդվածի 1-ին մասի 1-ին կետի համաձայն Սուսաննա Զաքարի Զաքարյանի և Ընկերության միջև առկա չեն եղել անձանց խմբի հատկանիշներ, քանի որ Սուսաննա Զաքարի Զաքարյանի մասնակցությունը ընկերության կանոնադրական կապիտալում կազմել է 33,34 տոկոս: Բացի այդ, ինչպես Ընկերության, այնպես էլ ֆիզիկական անձ Վարդան Ռուբիկի Հարությունյանի կողմից Հանձնաժողով չեն ներկայացվել Ընկերության և Վարդան Ռուբիկի Հարությունյանի, ինչպես նաև Ընկերության և Սուսաննա Զաքարի Զաքարյանի միջև անձանց խմբի առկայությունը հավաստող փաստաթղթեր: Հետևաբար, ֆիզիկական անձ Վարդան Ռուբիկի Հարությունյանի և «Արմենիան Տոբակո Քոմփանի» սահմանափակ պատասխանատվությամբ ընկերության միջև անձանց խմբի հատկանիշներ առկա չեն եղել: Հետևաբար, 2019 թվականի դեկտեմբերի 6-ին ֆիզիկական անձ Վարդան Ռուբիկի Հարությունյանի կողմից «Արմենիան Տոբակո Քոմփանի» սահմանափակ պատասխանատվությամբ ընկերության կանոնադրական կապիտալում Սուսաննա Զաքարի Զաքարյանին պատկանող 33,34 տոկոս բաժնեմասի ձեռքբերման գործարքը չի կարող համարվել անձանց խումբ հանդիսացող տնտեսավարող սուբյեկտների միջև իրականացված գործարք մինչև 2021 թվականի մայիսի 31-ը գործող խմբագրությամբ Օրենքի 4.1-ին հոդվածի 1-ին մասի 12-րդ կետի իմաստով:

Ուստի, Հանձնաժողովը, հաստատված է համարում համակենտրոնացման մասնակիցների կողմից իրավախախտում կատարած լինելը, մասնավորապես՝ ֆիզիկական անձ Վարդան Ռուբիկի Հարությունյանի և Ընկերության կողմից 2019 թվականի դեկտեմբերի 6-ի հայտարարագրման ենթակա համակենտրոնացումը մինչև գործողության մեջ դնելը չհայտարարագրելը, որի կապակցությամբ օրենսդրությամբ նախատեսված է իրավական հետևանք՝ պատասխանատվության միջոցի կիրառում:

5.2) Ընկերության և ֆիզիկական անձ Վարդան Ռուբիկի Հարությունյանի նկատմամբ պատասխանատվության միջոց կիրառելու հարցի կապակցությամբ:

Օրենքի 92-րդ հոդվածի համաձայն՝ տնտեսական մրցակցության բնագավառում իրավախախտման համար Հանձնաժողովն իրավասու է տնտեսավարող սուբյեկտներին, պետական մարմիններին և դրանց պաշտոնատար անձանց տալու նախազգուշացում կամ նշանակելու տուգանք:

Օրենքի 93-րդ հոդվածի 5-րդ մասի համաձայն՝ համակենտրոնացումը չհայտարարագրելու համար նշանակվող տուգանքի չափը կազմում է մինչև հինգ միլիոն դրամ:

Օրենքի 94-րդ հոդվածի 1-ին մասի համաձայն՝ պատասխանատվության միջոց կիրառելիս Հանձնաժողովը հաշվի է առնում տվյալ իրավախախտման բնույթը, տևողությունը, իրավախախտման հնարավոր կամ փաստացի ազդեցությունը շուկայում մրցակցային իրավիճակի կամ սպառողների շահերի վրա, տնտեսավարող սուբյեկտի

կողմից տվյալ խախտման կրկնակիությունը, եթե նախորդ խախտման համար պատասխանատվության միջոց կիրառելու օրվանից չի անցել հինգ տարի, տնտեսավարող սուբյեկտի դիտավորության աստիճանը, տնտեսավարող սուբյեկտի կողմից իրավախախտում կատարվելու շարժառիթները և հանգամանքները, տնտեսավարող սուբյեկտի կողմից իրավախախտում կատարվելու փաստն ընդունելու կամ Հանձնաժողովի հետ համագործակցելու հանգամանքը, պատասխանատվությունից ազատելու հիմքերը, տնտեսավարող սուբյեկտի վրա նշանակվող տուգանքի հնարավոր ազդեցությունը, տվյալ տնտեսավարող սուբյեկտի գործունեության ոլորտը և տնտեսավարող սուբյեկտի պատմությունը:

Նույնաբովանդակ դրույթներ են նախատեսված նաև մինչև 2021 թվականի մայիսի 31-ը գործող խմբագրությամբ Օրենքի 31-րդ և 36-րդ հոդվածներով:

Ընկերության և ֆիզիկական անձ Վարդան Ռուբիկի Հարությունյանի նկատմամբ պատասխանատվության միջոց կիրառելիս Հանձնաժողովը, ի թիվս այլնի, հաշվի է առնում հետևյալ հանգամանքները.

ա. իրավախախտման բնույթը. Ֆիզիկական անձ Վարդան Ռուբիկի Հարությունյանի կողմից 2019 թվականի դեկտեմբերի 6-ին «Արմենիան Տոբակո Քոմփանի» սահմանափակ պատասխանատվությամբ ընկերության կանոնադրական կապիտալում 33,34 տոկոս բաժնեմասի ձեռքբերումը համարվում է չհայտարարագրված համակենտրոնացում, որը հայտարարվելու դեպքում ենթակա կլիներ գնահատման որպես խառը համակենտրոնացում:

բ. տնտեսավարող սուբյեկտների կողմից իրավախախտում կատարելու շարժառիթները և հանգամանքները. Ֆիզիկական անձ Վարդան Ռուբիկի Հարությունյանը և Ընկերությունը գտնում են, որ Վարդան Ռուբիկի Հարությունյանի և Սուսաննա Զաքարի Զաքարյանի միջև բաժնեմասերի օտարումը (ֆիզիկական անձ Վարդան Ռուբիկի Հարությունյանի կողմից «Արմենիան Տոբակո Քոմփանի» սահմանափակ պատասխանատվությամբ ընկերության կանոնադրական կապիտալում Սուսաննա Զաքարի Զաքարյանին պատկանող 33,34 տոկոս բաժնեմասը ձեռք բերելը) տեղի է ունեցել անձանց խումբ հանդիսացող տնտեսավարող սուբյեկտների միջև, ուստի և այդպիսի համակենտրոնացումը ենթակա չի եղել հայտարարագրման:

գ. տնտեսավարող սուբյեկտների գործունեության ոլորտը.

1. Ֆիզիկական անձ Վարդան Ռուբիկի Հարությունյանը գործարքի իրականացման պահին որևէ տնտեսավարող սուբյեկտի կապիտալում մասնակցություն չի ունեցել: Ֆիզիկական անձ Վարդան Ռուբիկի Հարությունյանի հետ Օրենքի 4.1-ին հոդվածի 1-ին մասի 14-ին և 12-րդ կետերի իմաստով անձանց խումբ հանդիսացող «Ֆրիզե» սահմանափակ պատասխանատվությամբ ընկերությունը գործունեություն է իրականացնում է ռեստորանային ծառայությունների մատուցման ոլորտում:

2. Ընկերությունը գործունեություն է իրականացնում ծխախոտային արտադրատեսակների արտադրության ոլորտում:

դ. իրավախախտման հնարավոր կամ փաստացի ազդեցությունը շուկայում մրցակցային իրավիճակի վրա. 2019 թվականին ֆիզիկական անձ Վարդան Ռուբիկի Հարությունյանի կողմից «Արմենիան Տոբակո Քոմփանի» սահմանափակ

պատասխանատվությամբ ընկերության կանոնադրական կապիտալում 33,34 տոկոս բաժնեմասի ձեռք բերման գործարքը չի հանգեցրել մրցակցության կանխմանը, սահմանափակմանը, արգելմանը կամ մրցակցության վրա այլ բացասական հետևանքի, գերիշխող դիրքի առաջացմանը կամ ամրապնդմանը, հաշվի առնելով, որ այն հայտարարագրվելու դեպքում ենթակա կլիներ գնահատման որպես խառը համակենտրոնացում, քանի որ Ֆիզիկական անձ Վարդան Ռուբիկի Հարությունյանի հետ անձանց խումբ հանդիսացող «Ֆրիգե» սահմանափակ պատասխանատվությամբ ընկերությունը «Արմենիան Տոբակո Քոմփանի» սահմանափակ պատասխանատվությամբ ընկերության հետ գործունեություն են իրականացնում տարբեր ոլորտներում, բացի այդ, տվյալ դեպքում՝ փայաբաժին ձեռք բերողը և վաճառողը հանդիսացել են անձանց խումբ, հետևաբար գործարքը ընկերության գործունեության վրա ազդեցության էական փոփոխության չի հանգեցրել, ինչը ևս վկայում է, որ համակենտրոնացումը չի հանգեցրել մրցակցության կանխմանը, սահմանափակմանը, արգելմանը կամ մրցակցության վրա այլ բացասական հետևանքի, գերիշխող դիրքի առաջացմանը կամ ամրապնդմանը:

Այսպիսով, վերոնշյալ հանգամանքների համադրության արդյունքում՝ Հանձնաժողովն արձանագրում է, որ Ընկերության և ֆիզիկական անձ Վարդան Ռուբիկի Հարությունյանի նկատմամբ անհրաժեշտ է տալ նախազգուշացում:

5.3) Համակենտրոնացման՝ արգելման ենթակա չլինելու հարցի կապակցությամբ.

Օրենքի 70-րդ հոդվածի 1-ին մասի համաձայն՝ Հանձնաժողովն արգելում է հայտարարագրման ենթակա համակենտրոնացումը, եթե՝

1) Հանձնաժողովի ուսումնասիրությունների արդյունքների համաձայն՝ համակենտրոնացման հետևանքով կանխվելու, սահմանափակվելու, արգելվելու կամ այլ կերպ վատթարանալու է տնտեսական մրցակցությունը համապատասխան ապրանքային շուկայում, կամ

2) Հանձնաժողովի ուսումնասիրությունների արդյունքների համաձայն՝ համակենտրոնացումը հանգեցնելու է գերիշխող դիրքի առաջացմանը կամ ամրապնդմանը, կամ

3) Հանձնաժողովի ուսումնասիրությունների արդյունքների համաձայն՝ համակենտրոնացման հետևանքով վնասվելու են սպառողների շահերը, կամ (...):

Օրենքի 73-րդ հոդվածի 2-րդ մասի 1-ին կետի համաձայն՝ հայտարարագրման ենթակա համակենտրոնացումը համարվում է արգելված, եթե՝ այն գործողության մեջ է դրվել առանց Հանձնաժողովի՝ համակենտրոնացումը թույլատրելու մասին որոշման, և հետագայում Հանձնաժողովն ամրագրել է, որ այն ենթակա է արգելման:

Վերոնշյալ նորմերի վերլուծությունից հետևում է, որ եթե Հանձնաժողովի ուսումնասիրությունների արդյունքում չհայտարարագրված համակենտրոնացումը հանգեցրել է համապատասխան ապրանքային շուկայում մրցակցության կանխման, սահմանափակման, արգելման կամ այլ կերպ վատթարացման կամ սպառողների շահերի վնասման, առաջացրել կամ ամրապնդել է գերիշխող դիրքը, ապա այդ համակենտրոնացումը Հանձնաժողովի որոշմամբ կհամարվի արգելված համակենտրոնացում:

Տվյալ պարագայում Հանձնաժողովն արձանագրում է, որ Ընկերության և ֆիզիկական անձ Վարդան Ռուբիկի Հարությունյանի կողմից 2019 թվականի դեկտեմբերի 6-ի չհայտարարագրված համակենտրոնացումը արգելված համարելու հիմքերը բացակայում են, քանի որ համաձայն վերը ներկայացված հիմնավորման՝ այն չի հանգեցրել որևէ ապրանքային շուկայում տնտեսական մրցակցության կանխման, սահմանափակման, արգելման, այլ կերպ վատթարացման, չի առաջացրել կամ ամրապնդել տնտեսավարող սուբյեկտի գերիշխող դիրք, չի վնասել սպառողների շահերը:

Այսպիսով, վերոնշյալից ելնելով, Հանձնաժողովը գտնում է, որ ֆիզիկական անձ Վարդան Ռուբիկի Հարությունյանի կողմից 2019 թվականին «Արմենիան Տոբակո Քոմփանի» սահմանափակ պատասխանատվությամբ ընկերության կանոնադրական կապիտալում 33,34 տոկոս բաժնեմասի ձեռք բերման գործարքը, որը ենթակա էր հայտարարագրման, արգելված համակենտրոնացում չէ:

6. Եզրափակիչ մաս.

Հիմք ընդունելով վերոգրյալը և ղեկավարվելով Օրենքի 37-րդ հոդվածի 1-ին մասի 3-րդ կետով, 67-րդ հոդվածի 2-րդ մասով, «Վարչարարության հիմունքների և վարչական վարույթի մասին» օրենքի 70-րդ և 71-րդ հոդվածներով, Հայաստանի Հանրապետության վարչական դատավարության օրենսգրքի 72-րդ հոդվածի 1-ին մասի 1-ին կետով՝ Հանձնաժողովը

Ո Ր Ո Շ Ե Ց

1. «Արմենիան Տոբակո Քոմփանի» սահմանափակ պատասխանատվությամբ ընկերության և ֆիզիկական անձ Վարդան Ռուբիկի Հարությունյանի կողմից 2019 թվականի դեկտեմբերի 6-ի համակենտրոնացումը Օրենքով սահմանված կարգով չհայտարարագրելը որակել որպես չհայտարարագրված համակենտրոնացում (այսուհետ՝ **Օրենքի խախտում**):

2. Օրենքի խախտման համար «Արմենիան Տոբակո Քոմփանի» սահմանափակ պատասխանատվությամբ ընկերությանը տալ նախազգուշացում:

3. Օրենքի խախտման համար ֆիզիկական անձ Վարդան Ռուբիկի Հարությունյանին տալ նախազգուշացում:

4. Սույն որոշումը «Արմենիան Տոբակո Քոմփանի» սահմանափակ պատասխանատվությամբ ընկերության և ֆիզիկական անձ Վարդան Ռուբիկի Հարությունյանի նկատմամբ յուրաքանչյուրի մասով ուժի մեջ է մտնում դրա պատճենը համապատասխանաբար «Արմենիան Տոբակո Քոմփանի» սահմանափակ պատասխանատվությամբ ընկերությանը և ֆիզիկական անձ Վարդան Ռուբիկի Հարությունյանին հանձնելուն հաջորդող օրվանից:

5. Սույն որոշումը կարող է բողոքարկվել վարչական կամ դատական կարգով՝ ուժի մեջ մտնելու օրվանից երկամսյա ժամկետում:

6. Սույն որոշման բողոքարկումը չի կասեցնում դրա գործողությունը կամ կատարումը:

ՆԱԽԱԳԱՀ

Գ. ԳԵՎՈՐԳՅԱՆ

2021 թ. սեպտեմբերի 28
Երևան